



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 3

**Petra Kvitova-i asaya
tenziukshitsü**

**Nüburtem amokmerenba
atema Kejriwal-i police aitsü**



VOL. XXII ISSUE NO. 112 (ADOK 112) DIMAPUR RASEMNÜ (WEDNESDAY) TSÜKLAI (FEBRUARY) 05, 2025 ₹ 5.00

Naga Hoho-i "oil exploration" asütsü ajungshir

Dimapur, February 4, 2025 (Agencies): Naga Hoho-i Nagaland sorkar dang sendaktepa alirtem den jembitepba sülen oil and natural gas exploration tenziuktsü ayongzükogo.

Naga nunger rongsenketzüng nung nüjiso angutsü atema petroleum, oil, aser natural gas bushia agitettsüla ta Naga Hoho-i ashi.

Assam aser Nagaland tsüngda "disturbed areas" nung oil exploration aser royalty sharing indang jembitepba atema Naga Hoho-i "disputed border zones" nung state

anaprong tsüngda tenangzüktep ka magi tashi mapa meinyaktsüla" ta metetdaksüogo.

Totzü indang royalties atema Naga nungertem dang nungi tebilemba angadanger ang sorkari lemtet ka agitsüla ta parnokisa ashi.

Nagaland ya Assam Arakan Basin nung shilem ka lir aser hydrocarbon aika lir. Naga Hills nung hydrocarbons angutsü anungji Naga nungeria Nagaland nung fossil fuel deposits anguba ajanga tajangzük aser rongsenketzüng asoshi bilemstsüla ta Naga Hoho-i ashi.

Manipur nung Naga teloktemi ghonda 12 mokdangtsü

Imphal, February 4, 2025 (Agencies): Manipur kübok Chandel district nung Naga kin 11 senteper tentetba Chandel Naga People's Organisation (CNPO)-i February 12 nü lungkak aitsü metetdaksüogo.

CNPO-i Chandel aser Tengenupal district tem nung lokti sentong tulu ka aser ghonda 12 mokdangtsü ayongzükogo.

Centre sorkari Indo-Myanmar arrtsü atsü dangba aser Free Movement Regime (FMR) agienba anema parnoki lungkak aitsü.

February 12, 2025

anepdang 6:00 ako nungi parnoki mokdangtsü ta CNPO-i metetdaksüogo. CNPO, Kin Hoho tem, NSUC, aser NCAC teloktem February 3 nü rongdak senden ka amendang iba lemtet agia liasü.

Iba mokdang ya Chandel aser Tengenupal district tem nung Naga nunger alidak ajak nung kongshitsü aser iba nung public-i yariteptsü ayongzükter ta CNPO-i metetdaksüogo.

Nagaland kübok Longwa yimtsüng nung Konyak Union-i iba mesükba rally ka agiba sülen CNPO-isa February 12 nü agitsü ayongzükogo.

Centre-i ULFA-I nem show-cause notice agütsü

Guwahati, February 4, 2025 (Agencies): Centre sorkari United Liberation Front of Asom (ULFA) nem show-cause notice ka agütsüogo aser iba nung parnok küm pungu kümsük atema ozüngi noktangba telok ka asütsü metetdaksüogo.

Ministry of Home Affairs (MHA)-i iba sangdong ya Unlawful Activities (Prevention) Act, 1967 nung ajemdaker agütsü aser ULFA dang anogo 30 tsüngda telangzüba agütsütsü mapang züngzüksüogo.

Külen, Centre sorkarisa ULFA dang March 4, 2025 nü Gauhati High Court (old block) nung authorised representative mesüra legal counsel ka ajanga arutsü tetuyuba agütsüogo.

ULFA-i küm 40 shi inyaksangshia aruba sülen Centre den peace agreement

ka agia January 2023 nung loksa. Ajisüaka, Chairman Arabinda Rajkhowa-i anir tongtipang lennir kar Bangladesh nung apuba sülen olemtep nung adentsü lemtetba ajanga parnok telok sasep nung mepetmesü adoka lemsa.

Yimjung maparen nung adentsü memulungertemi Paresh Baruah lenisüba kübok ULFA (Independent) ta ser telok balaka tentet.

Baruah-i aniba ULFA-I ya 2012 nungi ozüngi noktangba telok ka ama züngshia arur.

December 2023 nung High Court of Bangladesh-i Paresh Baruah nem tasüba temerenshi agütsüba nungi taküm piyong tepuokdak ayutsü melenshitsü.

Taoba Bangladesh Prime Minister Sheikh Hasina'er sorkar kübok 2014 nung Paresh Baruah nem tasüba temerenshi agüja liasü.

Tzürangkong Kaketshir Mungdang-i CM Rio dang mepelar

Dimapur, February 4, 2025 (TYO): Tzürangkong nung ali rongsen agitetba nungi aruba sen Assam aser Nagaland tsüngda 50/50 lemsatsü ta Chief Minister Neiphiu Rio-i osangbener den jembidang ashiba angashia mepelar aser magizüker ta Tzürangkong Kaketshir Mungdang (TKM)-i metetdaksüogo.

Tzürangkong tzükong ya akhidang nungi Tzürangkong nunger aser Ao Naga nunger ali aser talidak lir. Ozü oboula nunger putu aika iba tzükong nung liyonga aru aser kümzüka

ayu anungji kibur mezüngmeshia aser ali temetentem alema shinga nem-a ali rongsen magidaksütsü, ta TKM-i sangdong ka nung ashi.

Ozü li nung ali rongsen bushiba mesüra agitetba mapa meinyakdaksütsü aser tangar shinga nem-a Tzürangkong nung ali rongsen agiteta agitsü memelatsü. Iba ya kanga dang süoki ia bilemstsüba ken o ka lir aser sorkar dang temulung agüja inyaksü ayongzükter ta TKM-isa ashi.

"Sorkari ali kiburtem den masüngdangtepi aiben lemtet

balala agia aruba onoki nguogo. Item lemtet ajanga nüngdak maliba ken o tem adoker aser talisa Nagaland ama state tila ka nung tanga state tem den arrtsüa aliba tesemtem nung mangatettep aser ali atsünga agiba ken o tem lir. Anungji Tzürangkong tzükong madak kiburtem ama onoki ozü li kümzüka ayutsü aser alemli nungi ozü temetentem lendongbang nung alidang ola madoki meyutsütsü" ta Tzürangkong Kaketshir M u n g d a n g - i s a metetdaksüogo.

Lotha Hoho-i contractor tem den jembiteptsü nungloktsü

Dimapur, February 4, 2025 (TYO): Ao Senden, Lotha Hoho, aser Sumi Hoho-i Nagaland Foothills Road Coordination Committee (NFHRCC), contractor tem aser kiburtem den rongdak senden ka ayonga menogo.

Mongulbarnü Lotha Hoho headquarters, Wokha nung senden amendang Foothill Road atema 'implementing agreement' nung sign asüba atema tekong merangtepba angatetteptsü atema bangzüng ana renema liasü.

Senden nung adenertemi Lotha Hoho-i Baghty division

nung mapa lempzüka aliba contractor firms den jembishinütsü mapa lempzüksü.

NFHRCC den implementing agreement nung sign sütepba ya 2013 küm Foothill Road tenzükdang nungi inyaka aruba mapa ka lir.

Lotha Hoho-i anogo pungu tsüngda contractors den angatetteptsü aser kin hoho 12-i pusema nungitba NFHRCC temzüng sülen anidaksü mulunga agizükdaksütsü mapa lempzüksüogo.

January 16, 2025 nü Ao Senden headquarters, Mokokchung nung kin asem

senden amendang bangjemtepba ama contractor temi züngzükja aliba mapang tsüngda implementing agreement nung sign mesüra lemteta aliba ama mapa inyaksü ta tanü senden nung akangshitepogo.

NFHRCC implementing agreement nung sign masüba contractor tem work orders agüja aliba meyipa agiang ta bangdak department rongshitsü senden nungsa lemteta lir.

Anogo pungu tsüngda NFHRCC den agreement nung sign masüba contractor shingaia mapa metenzüksüla ta senden nungsa bangjemtepogo.

Manipur CM Biren Singh mapa nungi anentsütsü akok

Guwahati, February 4, 2025 (Agencies): Union Home Minister Amit Shah-i Manipur nung Rural Development and Panchayati Raj (RD&PR) Minister Yumnam Khemchand Delhi-i jaok.

Hombar nikongdang 1:00 ako meta Khemchand-i Imphal toktsür Delhi-i apusoa ogo aser Mongulbar nikongdang pai Amit Shah den ajuruteptsü.

Delhi-i apusoa maodang Khemchand-i Chief Minister N Biren Singh lenisüba nung temulung masüba BJP MLA tem den ajurutepa senden ka amen.

Amit Shah-isa December 9, 2024 nü Manipur Legislative Assembly Speaker Th Satyabrata jaoka liasü. Iba sülen January 27 nunga tena ajurutepa tanabuba senden menogo.

Satyabrata-isa February 6 nü Amit Shah den tasemben atema ajuruteptsü imlar.

Item sendentem ya Manipur state nung lenisüba melenshitsü aser February 10 nungi tenziuktsü

aliba 12 buba Manipur Legislative Assembly session tiptema agitsü atema lir ta osang angazüker.

Külen, MLA Th Radheshyam-ia February 2 nü Amit Shah den ajurutepogo aser pa Delhi nung dang mongdar.

Delhi aser Imphal nung Biren Singh sorkar anema lungkak aiter aser lenisüba melenshitsü takhangba agütsür.

Manipur nung MLA 8-i Biren Singh aser MLA 40-i Satyabrata pusema nungiter.

Taruba Assembly session nung BJP MLA 10, Congress MLA5, JD(U) MLA5, NPP MLA 6 aser Independent MLA 3-i no-confidence motion ka benoktsü akok.

CLP leader Okram Ibobi den Congress MLA pezüi tawa tu Manipur Governor Ajay Kumar Bhalla den ajurutepogo.

Idangji parnoki Governor dang Chief Minister N Biren-i Manipur Legislative Assembly züngsemtem temeten aser maongkatem ajembanga o

mejembidaksütsü shia liasü.

CM N Biren Singh-i Assembly session nung no-confidence motion benoktsü aliba MLA tem amokmerenba anendakjang ta Ibobi Singh-isa Governor dang mepishia liasü.

MLA kari dangano-confidence motion benokra iba mapa inyaka moudaksütsü aser iba motion benokertempublic-i merenshitsü ta Chief Minister N Biren Singh-i ashiba olen Ibobi-isa ashi.

"Pai ibala olen mejembitsüla. State Assembly indang Rules of Procedure aser Conduct of Business ajanga onok nem tashi agüja lir. State shia pei pei procedural rules lir aser onoki onok constitutional rights amshitsü" ta Ibobi-isa ashi.

CM N Biren Singh ya MLA tenet- Heikham Dingo, Leishangthem Susindro, Thongam Biswajit, Thongam Shanti, Karam Shyam, Olish Shilshi aser Mayanglambam Rameshwar nungeri pusema nungiter ta osang angazüker.

DESO Mokokchung ajanga training agütsü



Mokokchung District kübok Registrars tem asoshi Online Registration of Births & Deaths indang training ka February 4, 2025 nü Tongdentsuyong Community Hall, Mokokchung nung agütsü dang tangokba noksa nung District Economics and Statistics Officer (DESO), Mokokchung S. Aoluen Imchen angur.

Dimapur, Tsüklai/February 04 (TYO): District Economics and Statistics Officer, Mokokchung ajanga Mokokchung District kübok Registrars ajunga asoshi Online Registration of Births & Deaths indang training ka February 4, 2025 nü Tongdentsuyong

Community Hall, Mokokchung nung ayongzüka liasü.

Iba sentong nung District Economics and Statistics Officer (DESO) Mokokchung, S. Aoluen Imchen menden liasü aser iba training program indang nükjiding lemsatapa liasü.

Iba training sentong nung

shisalen sayur ya Dr. Tumbenthung Y. Humtsoe, Economics & Statistics Officer (ESO) aser Ingaule Kenrang, ESO liasü aser parnoki Civil Registration System (CRS) in Nagaland aser Online Registration of Births and Death indang yimyatam awajema liasü.

Chümoukedima ya Municipal Corporation langa lir: Dr. John Murry

Dimapur, Tsüklai/February 04 (TYO): Chümoukedima Town Council nung züngsem ka ama sorkari shimba (government nominee) Longshi Kikon ajanga tenüngsang agütsüba sentong ka LUC Hall, Chümoukedima Town nung February 3, 2025 nü agidang, Chümoukedima town ya town council ama malitsüla aser Municipal Corporation ka akumtsü langa lir, ta NDPP State Treasurer, Dr. John Murry-i ashi.

Chümoukedima Town Council ya municipality akumtsü mapang yakta arutsü, ta pai imlaba lemsatap.

District tasen, Chümoukedima nung Government nominee councilor ka ama inyaksü atema Lotha kin nungi shimba atema Dr. Murry-i Chief Minister Neiphiu Rio, Advisor Zhaleo Rio aser Sr. Vice President NDPP, Charles Sekhose nung dang pelaba lemsatapa liasü.

Councilor ka ama Longshi Kikon shimba ya Chümoukedima jila nung Lotha nung 5000 dak tema aliba ajitetba lir aser sorkari Lotha nung tashi temeteter, züngsem aser yimtsü-yimbo temi nüburtem asoshi Chümoukedima district tajungba kuma

melenshiba nung yariteptsü imlar, ta pai ashi.

Government nominee Councilor, CTC, Longshi Kikon-ia Dr. John Murry dang nübur ajangzüksü asoshi anibelem mesasai inyakba asoshi pelaba lemsatapa liasü aser tashi temeteter, yimtsü-yimbo aser nüburtem nungi sarasadem, amalitep aser leniba meshia liasü.

Iba sentong nung menden ya PA to Advisor Agri & Border Affairs GON, James Kikon liasü aser Sr. Pastor, LBC Chumoukedima, N.Thungchio Lotha-i sentong tenzüka sarasadem aser N.Ekonthung Kikon-i melepzüng o jembia liasü.



East Dimapur Town Council ajanga EDBA (East Dimapur Business Association) aser EDTC Jurisdiction kübok shishilembar aser dokan kiburtem den lokti senden ka February 3, 2025 nü EDTC Office nung ayongzüka mena liasü. Shishilempartem wazüka ayutsü aser renlokdahtsütsü, East Dimapur ya tax maliba tesem kumdahtsütsü aser mapang liwar aliba osettem kanga junga meittsü nükjiding nung iba senden ya amen aser EDTC ajanga latettsüba ozüng ajunga sülen anidaksü mulungtep.

NAGALAND POLLUTION CONTROL BOARD						
Signal Point, Dimapur – 797112, Nagaland Tel.: 03862-245727, TeleFax: 03862-245726 Website: www.npcb.nagaland.gov.in e-mail: npqb2@yahoo.com						
AMBIENT AIR QUALITY FOR KOHIMA AND DIMAPUR CITY						
KOHIMA ASER DIMAPUR NUNG MOPUNG MERÜK-MEMERÜKBA JENJANG						
Sl. no	City	Location of air station	Type of area	Monitoring dates		Permissible limit As per the National Ambient Air Quality Standards "Iba tasazük alemabo metudakhtsütsüla"
				28.01.2025	30.01.2025	
1	Dimapur	Bank Colony	Residential	198	206	100 µg/m ³
2		Dhobinala	Commercial	242	248	
3		NPCB Office, Signal Colony	Residential	189	196	
4		Tenyiphe, Chumoukedima	Commercial	151	137	
5		Nagarjan	Residential	195	206	
6		Viola colony	Residential	175	172	
7		Burma camp	Commercial	243	256	
8	Kohima	Opposite NST Office	Residential	86	114	
9		PWD Junction	Commercial	124	128	
10		High School Junction	Commercial	148	169	
11		Midland (Upper)	Residential	99	139	

Iba osang ya nübortem ajangzüksü atema Nagaland Pollution Control Board-i agütsür.

Tuensang DC-i travel advisory agütsü

Dimapur, Tsüklai/February 04 (TYO): Tuensang-Longleng lenmang tang teyangludak aliba mechi February 4-11, 2025 anogotem iba lenmang nung gari tulu mesenzütsü Deputy Commissioner Tuensang,

Lithrongla Tongpi Rutsa-i sangdong ka nung metetdaksü. Lenmang yangluba maparen nung tetsükdahtsü majurui inyaksü mechi khen atema iba tenokdangba ya agütsür, ta sangdong ajanga ashi.

Dr. B. Henshet Phom-i Me-Dam-Me-Phi benjong moatsü

Dimapur, Tsüklai/February 04 (TYO): Vice Principal, Yingli College, Longleng Dr. B. Henshet Phom-i Tai Ahom nung Me-Dam-Me-Phi benjong nung tongti o jembia ama moaja aden.

Iba benjong ya Indigenous Peoples of Mung-Dua-Chun-Kan ajanga Charai district, Assam kübok Moran Botamora nung January 31, 2025 nü ayongzüka liasü.

Iba sentong nung Dr. B. Henshet Phom-i jembidang, politics aser tamangba yimsü ajanga nüburtem tsünta telemsa

adokdahtsür saka sobaliba ajanga nüburtem lungjemdahtsür ta ashi.

Pai Northeast India ya kanga tongtipang lir, kechiaser yangi South Asian plains aser South East Asian hills ajuruteper, ta ashi.

Tai Ahom lenirtemi East Asian aser South East Asian linük aika nungi Tai nüburtem den tesendaktep tashi itshiba atema Dr. B. Henshet Phom-i tenüngsang agütsü aser United Nations Declaration on the Rights of Indigenous Peoples (UNDRIP) nung shilem agiba atema pelaba lemsatapa liasü.

Baptist College Kohima nung awareness sentong ayongzü



Dimapur, Tsüklai/February 04 (TYO): Baptist College Kohima indang Legal Aid Committee ajanga kaketshir nem consumer temeden aser child labour ama nungi tanurtem kumzüka ayuba indang legal system tajungba nung angatetdahtsütsü nükjiding nung 'Legal Provisions Related to Child Labour Act & Consumer Protection Act' indang awareness program ayongzüka liasü.

Iba sentong nung Neiko Akami, Member Secretary, Nagaland State Legal Services Authority ajanga ozüng balala yangluba indang tamendak dak rateta ashi.

Pai Consumer Protection Act of 1986 ya koda tongtipang ta rateta ashi aser ibai consumer temeden wazüka ayutsü nükjiding nung yanglu, ta ashi.

Akmai-i iba Act kübok ken o benokba yimya rateta ashi, kong shishilempaba nung tim masüba yimya amshiba, services nung metokmeperi aser osettsüset meshidak dena lir.

Pai kaketshirtem dang saksalema alitsü ayongzüker aser

iba amala ken o nung compensation atema District Consumer Forum nem ken o agütsütsü yimyatam rateta ashi.

Pai jembiba onük tali tejangjaba nung angatetdahtsütsü mechi 'Harjol Ahluwalia v. Spring Meadows Hospital' (1998) ken o benoka liasü, kong medical tsütsü metokmeperi aliba ajanga nisung ka temang marakzüteiti akum.

Consumer rights den küleml Akmai-i kaketshirtem dang 'ragging' aser temesepba mozü amshiba densema ozüng alema inyakyim tamajung nungi pila alitsü ayongzüka liasü.

Sentong tanabuba nung Vimenno Kuostu, Panel Lawyer, Kohima District Legal Services Authority (DLSA) ajanga Child Labour Act 1986 indang rateta ashi.

Tanur nem mapa inyakdahtsüba ajanga meimchir temeden nung aibelenba aser temang nung timtem ajurutsüsa tesemtem nung arishi küm 14 tekübok tanurtem mapa inyakdahtsüba nokdangba indang lai jembia liasü.



Nationalist Democratic People's Party (NDPP) Mokokchung Region ajanga February 4, 2025 nü Deputy Commissioner, Mokokchung indang Conference Hall nung inoktsüba sound system tajung ka amokja liasü. Iba sentong nung SDO (Civil) Temsuchuba aser NDPP Mokokchung Region tir Mayangnungba aser party ketdangsürtem dena liasü.



TIR YIMYIM YIMOBILEM (EDITORIAL)

DIMAPUR RASEMNÜ, FEBRUARY (TSÜKLAI) 05, 2025

Cancer Anogo

- Tangsen Lemtur

Alima nung nüburtem nem cancer tashitak indang rajema kümdaktsütsü atema kümshia February 4 nü World Cancer Day ya International Day ama mongyonga arur. Ibaji ajanga aikati iba tashitak nungi jenbua alitsü mesüra tekeraba nung puteta anepaluba agi taneptsü anguba indang rajemer. Taküm World Cancer Day omenji 'United by Unique' lir. Cancer tashidak anema raraba tongbang nung shiranger shia nüngdakji balala; iba tangatetba nungji cancer agi shirangertem shia nüngdak apir anepalua yaritsü nükjidong nung iba omen shim. Iba omen nung ajemdaker 2025 küm nungi 2027 küm tashi cancer agi shirangertem, cancer tashidak koktetertem aser iba tashidak agi shirangertem ajangshibatem lemsateptsü. Tanü-asüngbo arishi küm 40-50 tsüngdapurtem-a aika dak cancer tashitak puteter, aser item zünga nem cancer tashitak indang tesayuba junga magütsüra parnok aikati mapang shitak nung medical teyari magitetsü. Naga nunger aikati kanga menor mesüra cancer advance stage tem nungang doctor bushia aoer. Medical tsütsülen nungi bushitetba agi, cancer tashitak kera meputetra aser mapang shitak nung teyari magira shiranger kati cancer tashitak anema raraba nung tamakok angur. Ano aikati tamang agi taneptsü bushir mesüra tanga mozütemji tongtibang ta züngshir; ajisüaka surgery, chemotherapy aser radiotherapy teyari agitsüji kanga tongtibang kümogo. Tashitak kara putettsüji kanga tongtibang, kechiyong kodang mezüng stage tem nung cancer tashitak asoshi teyari agidir, taneptsü angutsü maongkaji kanga ulua lir (talisa stage I cancer). Anungji tekaraba nung teyari agitsü maongkaji mesüidaktsütsüla. Tawa-tanü Nagaland nunga cancer tashitak kanga züindagi. Kechi kulitem ajanga yamai züiner? Cancer ya telemsa ana nung lir: Kaji tetsü-tebou azü nungi aruba (hereditary) aser kaji non-hereditary. Tetsü-tebou azü nungi aruba cancer case kanga ajemer, ajisüaka non-hereditary cancer bo kanga züindar. Hereditary cancer putettsü atema genetic tests agitsü nüngdak; aser iba osang (result) nungji ajemdaker doctor den angatettepa teyari agitsüla. Non-hereditary cancer ya tongtibangsa pei aliba tesem, achi-ajemba yimya aser taküm libaliro dak keta lir. Medical nisungtemi nüburtem dang mokozü nung akongba chiyungtsütem kanga ajema achitsü aser shizüka ayuba chiyungtsütem tera dang achitsü ajungshir. Talisa asen Aor aser Lotha nungeri aou lanu (bamboo shoot) shidaktsüba chiyungtsü tapu balala aika- itsük, itzü aser isü tali achir. Item ya ajanga tepok cancer adokdaktsüba nung shilem agir südi ta agizüktettsüsa lir. Itsük nung cancer adokdaktsüba 'carcinogens' ali asü mali'ar ano junga mejangja, saka item ya kanga ajema achitsü junger. Tesüiba küm 15 tsüngda Nagaland nung tepokpok cancer kanga züiner, aser iba ya lanurtem aikati mokozü adoka achiba moko achiba ajanga lir ta bilemer. Junga taneptsü angütsüji cancer kara puteter teyari agiba dak tuluka keta lir. Cancer kara putetba nükjidongji cancer mesen temang ajak nung meprokshidang yongi nokdangtsü atema lir. Medical screening test ajanga cancer tashitak kara puteter. Screening test ji pei temang jenjang metetner nisung mashii kati agitsü akok. Cancer tashitak tekaraba nung puteta teyari bushitsüji koda tongtibang, ibaji nüburtem nem angatetdaktsütsü atema doctor temi meranger. Ajisüaka medical nisungtem dak alia Arogo, sorkar agency tem, tesayurtem, kaketshirtem, youtubers, osangbenertem, melungtet teloktem (NGOs), village councils aser nijatemi awareness sentong balala ayonga agiba ajanga cancer anema raraba tongbang nung asenokia shilem agir asütsü.

OLEMSABANG

TSÜNGREM TENZÜKERTEMKANGA KÜMDANGA MEITAALITSÜLA

~ L. Kika Pongener.

(Yashi adok nungi...)

Aji oda, tanü asen lima nung arogotem nung tenzüker ajaki angatettsübaji....Asen tenzükbba arogo nung arogopurtemi asen mapa agi tenuk sunga tanang chiteta ali asü mali (?)ta tenzüker ajaki pei sasa shisadanga tenzüksüla. Aji oda, mimchir yimya agi antsü /entsü (egg) nunga teret chiteter....Ibaji mesuka arogopurtemi asen mapa agi temulong sua ali asü mali (?)....Ibaji pei sasa mangateti asen agi nuburtem melaaktetdaktsütsüla. Tanü asen lima nung, arogotem nung tenzükertem, pei sasa pei taküm aser pei mapa mebushidangba kar danga lira....Pei sasa angateta pei taküm/pei mapa khien bushidangtsü tenzükd. Tanü putu nung laishir takotet aika M.Th/Doctorate etc. tashi zünger, sempet tajung aketba, bendanga agütsüba lanur tajung aika arogo/mungdang nung tenzüknuka tajaba mali mapa maka aika lir-ko....Tanü arogotem nung jokorla, toklanga tenzükertema kümsuk (Term) lateta ayutsüla-a ta nuburtemi ola adoker....Aser lim arogo kar nungpo kümsuk tataktet (Term) lateta ayuba angazükogo....Arogopurtemi kechiba iba ama olaji adoker...??? Teshisadangtsü kar lir ta angateter.

Tang mapang ya lim arogotem aika nung rongsen ketdangsuba nung, nuburtemi tamang makatettsüsa aser ashishitsüsa kanga-sa tobur mejungi inyaktepba angudang, nuburtemi maremteti ola atoker sudi....Mesura arogotem nung tenzükertem mapa agi nuburtemi mulong masü ola atoker sudi....Hau-niii....Arogo nung tenzükertemjia Tsüngrem masü nisung dangji tashimait karbo alitsü sudi....Anungji nuburtem-ia ajak tajung-tajung dangpo meimlatsüla. Ajisuaka, tima ta-ka suang, mesura tim masüa ta-ka suang....Saka yimden aser lokti lennirtem-ia dena maremteti ola adoktsüsa akümba nungji teshisadangtsü aser tangatettsü lesson kar lir ta bilemer. Anungji nuburtemi ola adokbaji züba-zübaa meyutsüi, arogotem inyakyim khien meyipa reprangshitsüla aser arogotem nung tenzüker ajaki pei mapa khien meyipa reprangshitsüla. Kanga-sa tesasatsüka, tanü asen lokti nung jakdak-jakdaka aibelenyongjia, tejak apayutepa aibelenogo ta indang-indanga meshiteter, mesura tepo kümtepa miimbanga ayutsü meranger, mesura sen merijang/lakh aika auyazüka agir tai-tatok agütsür yutsüba agi tanü asen lokti memelenshir aser aibelener-jia tan masür aser maneni aibelentsüsa temulong ulua kümdaktsür.

Anungji nungsen metsübui tamajung agiaka, indang-indanga metongshitepra, asen lima aser asen lokti melenshitsü. Atangji, iba ama o tesepra, o temerang aser o tesashi jembitsüba aser zülutsüba ya kanga tanangpo masü, ashiko, karbo temulong yirutsü....Saka meshitak sernung shitaka ta....Majung sernung junger ta....Anemsu agi tenungsangtepba agi asen lima kodanga majungtsü aser memelenshitsü. Aji oda, arogotem nung tenzükertem, lanlia kilir tajung ta ashitsüsa bendanga agüja ochishia tenzüker aika lir-ko....Anungji shirnoki Tsüngrem aser arogopur tsüngdang sentsüh masütsüsa tenzüker parnok nembo junger niii....ta tenungsang agütsüdi....Ajisuaka, tenzüker kari Tsüngrem mulong machitsüsa aser nuburi mulong masütsüsa tenzükalira.... Iba amala tenzüker dangjipo indang-indanga aibelenogo ta shidi aser metongshitsüdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Somalia nung Khristan ka dak kinungtsüi azük, ola madokteter

Nairobi, Tsüklai/February 04 (Agencies): Somalia nung Islam nungi Khrista dangi meyipër ka dak pa tamangba yimsü melenba mechi kinungtsüi (Muslim) yinsang agi azükba sülen o mejembiteti kumogo ta osang ajanga ashir.

Somalia indang Lower Juba Region kübok jila ka nung arishi küm 35 tainAbdulai Ramadan ya Khristanpur den Bible study ka nung adenba meji kinungtsü ain adoka January 20 nü pa dak azük, ta Ramadan-i mozü kidang tezüluba nung Morning Star News dang ashi.

Ramadan ya 2020 küm Khristan yimsü agizük aser pa ya miim fellowship ka nungi lir. December 25 nü iba secret cell groups nungi pai Khristanpur asem Christmas benjongtsü pai kidangi jaok, aser yangji par tanur pezü aden, aser iba yongji pa kinuntsü mepelai akum, ta pai zülu nung ashi.

Pa kinungtsüi shilem magi aser iba aonung tena Khristan yimsü aser Islam yimsü indang asatepa lai pa dang pai amangba yimsü yutsütsü ashi.

"Nai kidangi bener aruba tamangba yimsü ya kibong, kinunger aser Islam yimsü amanger yimtsür-yimer asoshi maksü tulu lir," ta lai pa dang ashi aser idangji paia, "Ni Khrista dak amangba nungi temulung memeyiptsü. Na nüngdakba ajak ni agütsütsü mulunga aser renema lir, saka Khrista dak amangba yutsütsübo tamakoktsü," ta langzüa liasü, ta Ramadan-i ashi.

Pa kinungtsüi pa dang tarutsü nung par kidang Khristan yimsü dak sendakba maparen kecha meinyaktsü tekumdangtsü ashi aser kilong nung iba sentongji mezüng aser tatem südakjang ta shia liasü.

January 20 nung lai lar

tsürabor semdangba mapang Khristanpur tembar kati pa semdang aser tebur ana ya Lai zünga sarasadema liasü. Ramadan medemsang ya nikongdang 5:00 ako meta ao aser Ramadan kinungtsü nikongdang 6:30 ako meta kidangi meypa shilangba mapang tanur kati la dang sarasademba aser Temeshi Lai azüngba indang ashi.

Idangji Ramadan dang Bible study indang asüngdang aser la ainadoka "Asen kidang Khristanpur inyaksangshi kecha malitsü ta ana mulungtepaka nai maneni inyaker," ta ashi.

Iba sülen lai Ramadan dak yin oset taret kati atep, ta par tanur kati ashi, saka security mechi tenüng miimbanga ayu.

"Kübu ali nung lao aser tasüngnep ang nisung meteta aru. Kütsü onok dang kecha mashi anepdang yakta kidang nungi ayazüka ao. Kübui phone agizük saka call mesütet. Pai teka agi shiba dang call asütsüar ashi," ta tanuri ashi.

Tebui ashiba number nung tanuri call asü aser ghonda ka lir pastor ka aru. Pastor-i Morning Star News dang ashiba agi, pai Ramadan mozü kidangi anir maodang Ramadan kinuntsü aser lar kinunger nisung pongu arua "Tamangba yimsü tamajung, tamangba yimsü tamajung - oadokang," ta ayimtena liasü.

"La kumli majungba ngua ni tensa süngjemdaktsütsü merang, saka pa kinungtsüi maneni pa temenen nisung ta mezüngmeshi," ta security mechi tenüng miimshia pastor yagi ashi.

"Kinungbui tepang nungi olajang kata matoktet. Tetsürlar kinunger temi jala aser tanurtem kidangi anir aotsü atema balatsü akhanger."

Kidanger Muslim nungertema aru, ta pai ashi.

"Lendong ajurutsü ta ni meteta Ramadan ya arsanga kü indang gari nung inoker anir ao aser idangjia pa kinungtsüi mezüngmeshi o jembia liasü. 'Tangsa samaang aser kodanga meypa teshilang' ta lai ayimten. Ramadan tenütsü nung zübu tuluka liasü, pa süoshi azü agi melangbanger kanga kangshia liasü," ta pastor-i ashi.

Mozüki tonga aruba sülen doctor temi Ramadan temang reprang aser yinsang taret agi azükba ajanga pa o mejembitettsüsa kumogo ta ashi, ta pastor-i ashi.

Ramadan ya tanur pezü (kar arishi küm 11, ka 8, ka trok aser ka küm asem) lir aser tang tashi mozüki nung temang anepaluba mapang lir.

"Pai tanaben o jembitettsü aser tang iba sülen mera agitsü asoshi Tsüngrem dang sarasademjang. Ramadan dak atalokba sülen ozü fellowship lendong nung lir," ta pastor-i ashi.

Somalia indang constitution nung Islam ya state religion ka ama renema lir aser danga yimsü sayuba nokdanger, ta US State Department ajanga ashir. Iba linük nung ozüng ya sharia (Islamic law) tesayuba nung yanglua lir, aser Muslim masürtem asoshia tebendang mali.

Tamangba yimsü yutsüba asoshi tasüba temerenshi agütsütsü Islamic law nung shia lir. Somalia nung Islamic extremist telok Al Shabaab ya Al Qaeda den sendaktepa lir aser parnoki iba tesayuba sülen anidaker.

Open Doors ajanga alima nung Khristanpur alitsü asoshi linük tamajungtiba 50 asadangba 2025 World Watch List nung Somalia ya jenjang 2 buba nung lir.

ANOGO ABEN TSÜNGREM DEN

TAKOKBA TAMANGER

Kechiaser shibasa Tsüngrem nungi aso, pai alima akoker aser takokba kobai alima ajeter ibaji asen tamang. ~ 1 Yohan 5:4

Tsüngrem chir shiaji takokba Khristan taküm alitsü Pai akhanger. Takokba Khristan taküm kaji tanaben asoba taküm aser Yisu azü ajanga temenen nungi merüktetba ajanga dang kümtet. Aiben asenoki mapa tulu nung takok anguba agi, mesüra tetsü tebu nungi tamanger süa aruba agi, mesüra Pa talangka tenzükaba mesüra tenla tulu agütsüba agi takokba tamanger kümdaktsür ta bilemer Saka iba dang nungi temaba ka lir, aser aji temenen madak takok anguba aser tasen asoba taküm shirnok kotak asoshi lir.

Temeimbatem, temenen kobai anogoshia Tsüngrem lenmang nokdanger aser alima sülen jajadaktsür item tatsüba ajak nungi takok angutsü Pai ajar. Tanü na aser nia takokba Khristan taküm ka kümnüra asen tamang ken reprangshidi arung. Tsüngremi Pei chir nem agütsüba takoba tamang kobai alima ajeter aser temenen madak takok angu iba kasa takokba tamangji pa chirtem shia nem aguja lir. Anungji, iba ochiba aser takokba tamang jagi asen kija kibong len anidaktsütsü asen tamang sarasadem sudi. Amen.

Anti-conversion law kübok Khristan apuani tepuokdak ayur



Lucknow, Tsüklai/February 04 (Agencies): Uttar Pradesh indang "anti-conversion" law kübok Khristan apuani küm pongu tepuokdak ayutsü obendang agütsüogo aser ibai India nung iba ama temerenshi mezüng alitsü ta ashir.

Jose aser Sheeja Pappachan nati nisung kar tashiyim amshia Khrista dangi meyipdaktsütsü merang ta tai tongloktsüba sülen aitsü, koba Khristanpuri tim masü ta ashir.

Ambedkar Nagar District nung aliba special court kati

obendang agütsüba nungya nisung shia dang senchi sen 25,000 dena lir, ta The Times of India ajanga ashir.

United Christian Forum indang national coordinator A.C. Michael-i iba obendang aitsü aser kuli agütsüba ajanga tamangba yimsü melendaktsüba mesayur ta ashi.

"Tamangba yimsü melendaktsütsü merang ta temulung melemi aliba atema iba ama temerenshi agütsüba tang mezüng angashir," ta Michael-i UCA News dang ashi.

Tamangba yimsü melendaktsütsü merangba nung temulung melemi aliba indang temaba court nung mejembitsü, ta pai ashi.

Uttar Pradesh anti-conversion law ya 2024 küm yanglu, anungji tamangba yimsü melenba inyakyim indang dangaria ashishitsü akoker. Shidakba ozüng nungbo tashiyim amshia tamangba yimsü melendaktsür mesüra kinunger nem dang ashishitep ken o benoktsü mela liasü.

Iba ken o benoker ya Chandrika Prasad Upadhyay lir, shiba Hindu nationalist Bharatiya Janata Party züngsem aser state nung ozüng yanglur ka lir. January 2023 nü Khristan apuani yagi Shahpur Firoz tesem nung timtema alirtem, talisa Dalits mesüra tajemzükba jenjang nung alirtem dak tenük yok ta tai tongloktsü. Christmas Day 2022 nung mass conversions atema tenati sentong ka ayongzük, ta lai tai tongloktsü.

Ken o jembiba mapang apuani nati tashiyim amshia tamangba yimsü melendaktsütsü merangba masü saka shisaliok agütsütsü tebilemba liasü ta ashi. Tenati Laishiba lema agütsü, educational assemblies ayongzük aser lokti chiyongdaktsü, saka parnok mesüzüktsü tebilemba meliasü, ta tenati ashi.

Tenük kuli alirtemi ashiba nung ajemdaker police temi ken o benok.

Court-i Uttar Pradesh Prohibition of Unlawful Conversion of Religion Act aser Scheduled Castes and Scheduled Tribes (Prevention of Atrocities) Act kübok iba obendang agütsü.

Tena ita ti under trials ama tepuokdak aliba sülen tenati tesayuba tajung agütsür, Temeshi Lai lema agütsü, tanurtem kaket shisatsü angutsü ajungmeso, yimdaklir assemblies ayongzük aser nüburtem chiyongdaktsüba sentong ayongzük, yimdaklir dang merarateptsü aser yim

majemtsü ta ashiba ya mesüzükba masü ta angateta state indang High Court ajanga September 2023 nung bail nung chiok, ta United Kingdom nung aliba Christian Solidarity Worldwide ajanga ashi.

Taoba ita UCF ajanga sangdong ka agütsüba nung, taoba küm linük nung Khristanpur anema azüdokshiba aser merenshiba tejangja 834 liasü, ta ashi. 2014 küm iba ama tatalokba ya 127 liasü.

2024 küm Uttar Pradesh nung Khristanpur dak tenük yoker mapa tamajung inyakba 209 liasü, ta UCF ajanga ashi.

Tashiyim amshia tamangba yimsü melendaktsü ta tai tonglokja linük nung Khristanpur 100 tepuokdak ayu aser bail magütsür, ta UCF ajanga ashi.

India nung Khristanpur shilem 2.3, Hindu nunger shilem 80 lir aser tashiyim amshia Khristan yimsü agizükdaktsütsü merangba anendaktsür ta shia mapa tamajung inyakba jenti lir, ta UCF ajanga ashir.

AO OSHI ANGAZÜKDAK:**TANÜ ANGAZÜKTSÜBA OJANG****Teimbalen**

(adj) tesadang dang nungi tali (majority)

* Ayong nung apuba ango teimbalen tanubusang nem agütsü.

Teimla

(n) angutsü mesüra akoktsü ta amangba (hope)

* Nisung taküm ya teimla agi pelaa alir.nurtem aikati tedongtechi mayur.



Tir Yimyim

OLONG PAITEP # 7055

	1				2			3		4
5								6		
7			8							
								9		
		10								
11										12
					13					
					14					
15										

TIPIEN

1. Balaka
6. Aika shirangba
7. Tar tatsü
9. Nenü'er jabaso
10. Sen latettsüba
11. Tangar kübok alir
14. Lon nung inokba
15. Tzü ayimdak
16. Ajok

-

(5)

-

(4)

-

(6)

-

(4)

-

(7)

-

(4)

-

(6)

-

(4)

-

(5)

LANGTSÜNGLEN

2. Hai sür inyak
3. Aor tenüing ka
4. Ali telungi talangka lur
5. Tebang kenyongi mazüoker
8. Ken atema anenzükertem
9. Toktepa noktak
10. Sen
11. Benjong agi
12. Telung nung rizünga ayu
13. Tebang nung enok

-

(4)

-

(6)

-

(5)

-

(4)

-

(5)

-

(5)

-

(6)

-

(5)

-

(4)

OLONG PAITEP # 7054 TELANGZÜBA**TIPIEN :**

1. Aben, 4. Artsü, 7. Lisem,
8. Liwa, 9. Sarasadem,
12. Aket, 14. Mangu,
15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar,
6. Belem, 9. Süjak,
10. Aonung, 11. Dokan,
13. Tinu.

NAI-A YA METETTER MA

Arizona film festival display ka nung movie posters 1,300 tema ayuba atema Guinness World Record ka yangluogo. Guinness World Records adjudicator-i Chandler Film Festival indang wall of posters nung ayuba Look Dine-in Cinema repringdang aser iba sülen "world's largest display of movie posters" kulikaket agütsü.

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimyim bureau tem nung agüjang.

World Cancer Day nung nisung 2 nem tetushi agütsü

North Lakhimpur, February 4, 2025 (Agencies): North Lakhimpur nung Mongulbarnü World Cancer Day amongdang cancer nungi taneptsü anguba tetsür ana nem tenüingsang agütsüogo.

Lakhimpur district nung cancer survivors anaji Jitumoni Gohain aser Gopi Lama na lir aser Lakhimpur Cancer Care Centre o District Health Services ajanga tena nem

tenüingsang agütsü.

Lakhimpur Commerce College indang seminar hall nung World Cancer Day amongdang sempet agütsü.

Iba sentong ya Lakhimpur District Health Society aser Lakhimpur Cancer Care Centre külemi ayongzük aser Lakhimpur Commerce College nung Physical and Mental Wellness Cell-ia yaritep.

Iba sentong nung

Lakhimpur Cancer Centre nungi Dr. Mrinal Jyoti Hazarika-i cancer awareness and care indang presentation ka sayua liasü.

Sentong nungsa Joint Director of Health-Lakhimpur Dr Biman Chandra Sarma, Lakhimpur Cancer Centre Dr. Gopal Purakayastha aser ADC-Health, Lakhimpur Gautam Priyam Mahanta nunger aden.

Tinsukia district nung ozüing alema nakmati aturtem raratep

Digboi, February 4, 2025 (Agencies): Assam kübok Tinsukia district nung nisung telok ana yimdong nung raratep aser parnok ya ozüing alema nakmati shishilembartem lir ta osang angazüker.

Hombar anüingdang Lekhapani nung telok ana tsüingda raratep. Lekhapani

telongtet nung ozüing alema nakmati atuba atema telok ana tsüingda tangatettep kati marutetba sülen raratep.

Iba tatalokba indang video footage ka nung nisungtem kati ka arrshitepa aser züktepa lir.

Iba tatalokba sülen telok anaprongi ken o tem benoka lir

asir bushisüingdang südar ta SP Tinsukia IPS Abhijit Gurav-i ashi.

"Sulfa züingsemtem aser iba tesem nung alirtem tsüingda rara adok" ta SP Gurav-i ashi.

"Onoki telok anaprong nungi temulung melemi bilemtertem puogo aser bushisüingdang südar" ta paisa ashi.

Manipur police-i tatalokba balala nung telungpur 9 apu

Imphal, February 4, 2025 (Agencies): Manipur police-i February 2 aser 3 anogotem district balala nung telungpur 9 tashi puogo.

February 3 nü Imphal East district kübok Mantripukhri Thakurbari nung Kangleipak Communist Party (KCP - City Meitei) züingsem 5 apu.

Parnok ya Laishram Bulu Singh (26), RK Nelson (19), Lairelrakpam Thoiba Singh (27), Kangujam Jebash Singh (28) aser Boyamayum Zabirkhan (19) nunger ta jangjaogo.

Police-i parnok ket nungi 9mm pistol den magazine, 36 HE Hand Grenade, mobile phones 3, Rs. 5700 aser gari ka ngutetogo.

Kasa anogo nung Manipur police-isa mita aodang Thoubal

district kübok Yairipok Bazar nung People's Revolutionary Party of Kangleipak (PREPAK-PRO) züingsem ka apu.

Iba nisung ya Sinam Yaima Meitei (45) ta jangjaogo aser pa ket nungi mobile phone ka den gari ka pua lir.

Sepaitemisa Singjamei Thokchom Leikai nung Kangleipak Communist Party (KCP MC Progressive) züingsem ka apu.

Iba nisung ya Khangembam Bipin Singh (50) ta jangjaogo aser pa ya tashiyim agi sen saruba ken o atema apu.

Kakching district kübok Irengband Hawairou nunga Pheiroijam Thoiba Singh (23) ta ser United People's Party of Kangleipak (UPPK) züingsem ka apu.

Iba nisung ya Kakching, Thoubal aser Imphal West district tem nung nübortem dang nungi tashiyim agi sen saruba atema apu.

February 2 nü Kakching district kübok Wabagai bazaar nungi Kanglei Yawol Kanna Lup (KYKL) züingsem ka apu.

Pa ya Mayengbam Joychandra Singh (24) lir ta jangjaogo aser Kakching, Thoubal o Imphal West district tem nung tashiyim agi sen saruba atema apu.

February 2 nungsa Imphal West district nung Khuyathong crossing nungi police-i nisung ka apu. Iba nisung ya Telheiba Ningombam (31) ta jangjaogo aser pa ket nung 9mm Pistol den magazine, mobile phone ka, Aadhaar card aser gari ka ngutetogo.

AFC/M23 teloki DRC nung ceasefire sangdongogo

Kinshasa, Tsüklai/February 4 (Agencies): Democratic Republic of the Congo (DRC) nung Rawanda-i teyari agütsüba teloki sangdong ka ajanga, humanitarian kulitem dak ajemdaker parnoki linük anütoklen tesemtem makyoka aoba anena atatsü ta shiogo.

AFC/M23 rebel coalition-i Hombarnü menor ashiba agi parnoki Mongolbarnü nungi tenzüka ceasefire ka benoktsü.

Kidanger Rawanda nungi sepai noklang aikati teyari agüja iba telok yagi DRC anütoklen yimti tontibangtiba Goma taoba hopta atsünga liasü.

United Nations-i ashiba agi, iba yimti atema raraba mapang nisung 900 shi tepsetogo aser nisung meyrejang aika pei talidak ki toktsür jenshiaogo.

Rara nungi jena aotsü atema nüburtem nem temelaba agütsütsü asoshi humanitarian corridor ka lapoktsütsü ayonzükba tali küma odor. Ajisüaka Kinshasa nung amendaker

aliba DRC sorkar-i iba dak sendakba nung telangzüba kecha magütsü aser linük military-i ceasefire benokba ya akümtsübutzü metsübutzü mejangja.

"Kinshasa nung amendkaer aliba sorkari adokdaksüba humanitarian crisis dak sendakba nung telangzüba agüja Alliance Fleuve Congo (AFC/M23)-i humanitarian kulitem dak ajemdaker February 4 nü nungi ceasefire benokba sangdonger," ta iba telok yagi X nung post ka ajanga metetdaksü.

Goma yimti kong nisung million ana alir aser alirongsen kanga takar lir, iba yimti atsünga sülen sorkar anemertem ya tawa Bukavu leni odor. Bukavu ya DRC anütoklen ano tongtibang tesem ka lir. Iba telok yagi taoba mapang linük yimtiba atsüngtsü atema DRC ajunga azüoka aotsü parnok nükjidong lir, ta shiogo.

Ajisüaka tawa sangdong ka ajanga parnoki provincial yimti yabo mamaktsü ta shiogo. "Bukavu mesüra

tanga tesemtem atsüngtsü atema onok tebilemba mali ta jangjashitsür. Ajisüaka civilian tem aser onok tamendakdak kümzüka ayutsü asoshi onok bendanga agütsür lir," ta M23 otongdar Lawrence Kanyuka-i ashi.

UN-i Hombarnü ashiba agi, Goma yimtung nung tasü mang 900 bo ngutetogo, saka asürtem ya iba dang nung timba asütsü imlar, kechiyong morgue-i bener aoba tasü mang aser yimti tezülen aliba tasü mangtembo züngoksema mali.

Local ketdangsürtemi taoba hopta nisung 2,900 yiruba asatetogo.

Hopta tatemi regional summit ka, kong Congo aser Rwanda tiri shiem agitsü lir, iba senden mamen tsüngda tang rara anena atatsü asoshi sangdongogo.

DRC tir Felix Tshisekedi aser Rwandan tir Paul Kagame na taoba mapang yimjung atema sensaksem nung shilem magitet. Ajisüaka Kenya-i ashiba agi, tang agitsü aliba summit nungbo linük anapronglai

shiem agitsü.

M23 teloki DRC nung ceasefire sangdongogo

Kinshasa, Tsüklai/February 4 (Agencies): Democratic Republic of the Congo (DRC) nung Rawanda-i teyari agütsüba teloki sangdong ka ajanga, humanitarian kulitem dak ajemdaker parnoki linük anütoklen tesemtem makyoka aoba anena atatsü ta shiogo.

AFC/M23 rebel coalition-i Hombarnü menor ashiba agi parnoki Mongolbarnü nungi tenzüka ceasefire ka benoktsü.

Kidanger Rawanda nungi sepai noklang aikati teyari agüja iba telok yagi DRC anütoklen yimti tontibangtiba Goma taoba hopta atsünga liasü.

United Nations-i ashiba agi, iba yimti atema raraba mapang nisung 900 shi tepsetogo aser nisung meyrejang aika pei talidak ki toktsür jenshiaogo.

Rara nungi jena aotsü atema nüburtem nem temelaba agütsütsü asoshi humanitarian corridor ka lapoktsütsü ayonzükba tali küma odor. Ajisüaka Kinshasa nung amendaker aliba DRC-i iba dak sendakba nung telangzüba kecha magütsü aser linük military-i ceasefire benokba ya akümtsübutzü metsübutzü mejangja.

"Kinshasa nung amendkaer aliba sorkari adokdaksüba humanitarian crisis dak sendakba nung telangzüba agüja Alliance Fleuve Congo (AFC/M23)-i humanitarian kulitem dak ajemdaker February 4 nü nungi ceasefire benokba sangdonger," ta iba telok yagi X nung post ka ajanga

metetdaksü.

Goma yimti kong nisung million ana alir aser alirongsen kanga takar lir, iba yimti atsünga sülen sorkar anemertem ya tawa Bukavu leni odor. Bukavu ya DRC anütoklen ano tongtibang tesem ka lir. Iba telok yagi taoba mapang linük yimtiba atsüngtsü atema DRC ajunga azüoka aotsü parnok nükjidong lir, ta shiogo.

Ajisüaka tawa sangdong ka ajanga parnoki provincial yimti yabo mamaktsü ta shiogo.

"Bukavu mesüra tanga tesemtem atsüngtsü atema onok tebilemba mali ta jangjashitsür. Ajisüaka civilian tem aser onok tamendakdak kümzüka ayutsü asoshi onok bendanga agütsür lir," ta M23 otongdar Lawrence Kanyuka-i ashi.

UN-i Hombarnü ashiba agi, Goma yimtung nung tasü mang 900 bo ngutetogo, saka asürtem ya iba dang nung timba asütsü imlar, kechiyong morgue-i bener aoba tasü mang aser yimti tezülen aliba tasü mangtembo züngoksema mali.

Local ketdangsürtemi taoba hopta nisung 2,900 yiruba asatetogo.

Hopta tatemi regional summit ka, kong Congo aser Rwanda tiri shiem agitsü lir, iba senden mamen tsüngda tang rara anena atatsü asoshi sangdongogo.

DRC tir Felix Tshisekedi aser Rwandan tir Paul Kagame na taoba mapang yimjung atema sensaksem nung shilem magitet. Ajisüaka Kenya-i ashiba agi, tang agitsü aliba summit nungbo linük anapronglai shiem agitsü.

Russia-Ukraine front line nungi North Korean sepaitem ainshiogo

Kyiv, Tsüklai/February 04 (Agencies): Russia-i Ukraine amakba nung yaritsü atema yokba North Korean sepaitem aika asü-ama ajuruba sülen anizüker ogo ta osangtem ajanga ashir.

Russian sepaitem den külemi raratsü asoshi Pyongyang-i sepai 10,000 shi yok südi ta amanga liasü, saka parnok ya hopta ishika front line nung mali, ta South Korea indang Yonhap news agency ajanga Mongulbarnü ashi. Ukraine aser US media temia sepaitem anizüker aoba shia liasü, aser parnok aruba ajanga Ukraine nung rara tesashiba akumtsü tsüboa liasü.

South Korea indang National Intelligence Service (NIS) ajanga AFP news agency dang, North Korean units tem Russia indang Kursk region nung January ita tiyonglen nungi combat operations anena lir ta shia liasü. "Asü-amar jenti aliba yong yamai asür alitsü südi, saka tejangja ano memetet," ta itdangiterba agency ajanga ashi.

Hokulbarnü Ukrainian military analysis-ia North Ko-

rean sepaitem kanga sashia akoksaba sülen anizüker oa alitsü südi ta amanger ta shia liasü.

Ukraine-i taoba mapanga Kursk region nung North Korean units aika puogo mesüra tepsetogo ta shia liasü, kong parnoki August ita aoksaa arütsü alema aita amak tenzü.

Tir Volodymyr Zelenskyy-i pua aliba North Korean sepaitem den asü ngdangyaba footage ayua liasü.

Iba region temeket nung North Korean sepai 300 shi tepsetogo aser ano 2,700 yirua lir, ta NIS ajanga January ita tiyonglen asadangteta liasü.

Kursk nung North Korean sepaitem yoka aliba ya Pyongyang mesüra Moscow-i sangdonga mali aser shidakbo Russia army yaria Ukraine sepaitem meindokba nung yaritsü liasü. Saka ita trok jungnüa arudang iba region nung Ukraine ket nung litsü tuluka lir.

Sepaitem samaba mechi Pyongyang-i ano tali yoksemtsü renemtar ta Seoul-i taoba mapang shia liasü.

Israel-i chiokba 15 Turkey tongogo: FM

Istanbul, Tsüklai/February 4 (Agencies): Gaza den ceasefire atema nangzüktepba kübok Israel-i chiokba Palestine nunger terpongu Turkey tongogo, ta foreign minister Hakan Fidan-i Mongolbarnü ashi.

"Anogo ishika tejakdang Palestine nunger 15 Israel-i chiokba sülen Cairo ajanga Turkey-i aruogo," ta pai Egypt foreign minister Badr Abdelatty den külemi osangbenertem den sensaksemba mapang Fidan-i ashi.

Taoba mapang tepuokdak yua alirtem ya Cairo nung Turkish embassy-i visa agüja liasü, ta paisa shisem.

Gaza ceasefire mezü ngbuba shilem nung Hamas puri pua aliba Israel nunger 33 chiokogo aser iba melena Israel kübok tepuokdak balala nung puoka alir 1,900 chioktsü. Tepuokertem ya timba Palestine nunger lir.

Tepuokertem ya chiokba sülen parnok timbaka teti atema mintoktsü aser Fidan-i Deobarnü Doha nung ashiba agi, Turkey-i parnok ishikabo agizüktettsü.

Mulungnen O

TASOBA: 16:03:1931 | TASUBA: 25:01:2025

Onoki teti meima aliba Obala **Lt. IMPANGONEN IMSONG (UNGER)** shirangba anogo nungi tasü nü tashi ana aser talang nungi yimer yimsanger, arogotem, kidanger, kiyonger, medemertem aser temeibatem nenok kwi kati Obala tatembang anogo tashi nung ozü den temeim mapa agi lenmang balala ajanga lemsatepogo, nenok ajak dang kanga pelaba lemsateper.

Nenok temeim mapa tajung tulusang Tsü ngremi moatsütsü ozü tamang sarasadem. Item kija aser lokti dang mejeta pelaba lemsateper.

- Unger Baptist Arogo.
- Dr. Imsulemba, Lenjem Hospital (Mokokchung) and staff.
- CIHSR(Dimapur), Doctors and staff.
- Dimapur Ao Baptist Arogo.

Temeim Kinungtsü, Jalatem, Anükapang aser Semchirtem.

Shillong nung mezüngbuba ISL asaya ayongzüka asayatsü renemer

Tsüklai/February 4, 2025

(Agencies): Shillong nung NorthEast United FC pur 'home' asaya ka Hokolbarnü Mumbai City FC den asayaba sülen Indian Super League nung ano asayaba tesem ka bendenloktsü. Iba asaya ya Jawaharlal Nehru Stadium nung asayatsü.

Meghalaya nung football asaya meimertem iba ISL asaya atema kanga yongyatepa ataogo.

Guwahati nung amendaker aliba club ya ano Shillong nung Bengaluru FC aser East Bengal na dena February 21 aser March 8 nü asayatsü. Asayatem nung Sunil Chhetri, Lallianzuala Chhangte aser Naorem Mahesh Singh nunger amala India nunger asayar tajungtibatem asayaba angutsü.

NorthEast United CEO Mandar Tamhane-i Mongolbarnü club asayatem shillong-i belener aoba indang

lemsatepa liasü.

"Ni India nung football asaya nung küm 25 dak tema sendaka aruogo saka onok idaki Shillong Lajong den Durand Cup semifinal asayaba mapang ni tenük lapoka liasü," ta Tamhane-i ashi.

"Online ticket tem minute 12 nung yokma aser physical tickets atema nüburtem km5 tashi tarensena nokdaka liasü. District balala nung fan tem indang park tema sünger liasü.

"Onok ya state ti tenüing nung nokdakba club ka lir aser onoki Northeast kübok tesem balalai football asaya ya bener oner. Durand Cup mapang telangzüba tajung anguba sülen takümsa Shillong nung asayatsü atema onoki telemtetba agia liasü," ta pai ashi.

Paisa, iba jenjang agitsü atema Meghalaya sorkari teyari agüja liasü, ta shisem.

NorthEast United forward Redeem Tlang, shiba Shillong

nungi lir, pa ya ISL nung local asayar tajungtiba rongnung ka lir. Pa ISL nung 100 dak temaben asayaogo aser 2024 küm NorthEast United puri otsüsütsüsa Durand Cup akokba mapang pai tongtibang shilem agia liasü aser pa tang kidangi arua asayatsü yongyaseta atadar.

"Kü atema aser Meghalaya nung aliba nüburtem atema Shillong nung ISL asaya reprangtsü ya kanga dang jangrademtsü mapang ka lir.

"ISL ya linük nung ajak dang tongtibangtiba league lir aser iba asayamung kidangi aruba atema kanga pelar. Meghalaya nung aliba nüburtemi football asaya meimer. Football ya Shillong nung tamangba yimsü ka ama lir. Idaki ina atuba mapa football ya mezüngbuba asayar," ta Tlang-i ashi, shiba Shillong Lajong nungi asaya-a career tenzüka liasü.

Kvitova-i asaya tenzükhitsü

Tsüklai/February 4, 2025

(Agencies): Wimbledon anaben koker aliba asayar Petra Kvitova-i Hombarnü sangdong ka ajanga, la jabaso asoba sülen ita tenet lir asaya tenzükhitsü ta metetdaksüogo.

"Tennis asaya nungi ita terpongu pilar aliba aser jabaso Petr asoba sülen ni tennis circuit-i tanaben meyipa arutsü," ta Kvitova-i Instagram nung video osang ka ajanga metetdaksü.

Laisa, la February tatemlen Austin nung asaya tenzükhitsü aser March ita Miami nung maneni asayatsü.

"Ni tennis asaya aser toktepa asayaba menongrar," ta arishi küm 34 tain Czech tsürla yagi ashi, shibai 2011 aser 2014 küm Wimbledon kokogo. Taoba mapang world number two asayar ya 2023 küm July ita la indang coach Jiri Vanek den kibong küma liasü.

La mashisa akümba ajanga

asaya nungi anisüngzükhitsü atema telemtetba agiba 2024 küm January 1 nü sangdong aser taoba küm July 7 nü jabaso ka aso.

Kvitova-i WTA kija asaya 31 koker lir.

Kvitova, shiba tatemsa 2023 küm October ita China Open nung asaya liasü, la mezüngbuba Austin, Texas nung ATX Open nung asayatsü. Iba asayamung ya February 24 nü tenzükhitsü.

Kvitova ya lar putu nung takok tajungtiba anguba asayar rongnung ka lir aser lai tang tashi nung WTA kija asaya 31 koka lir. Lai akokba asayamungtem rongnung tongtibangbaji Wimbledon anaben akokba ya asütsü.

La tanur asotsü atema animesüngzükhitsü tsüngda Kvitova kanga junga asaya liasü aser 2023 küm lai Miami aser Berlin nung WTA 1000 titles ana koka liasü.

Man City-i Gonzalez alizük; Tel Spurs nung denogo

Tsüklai/February 4, 2025

(Agencies): Hombarnü transfer widow shibangtsü lia Manchester City-i Porto nungi midfielder Nico Gonzalez alizükogo aser kasa mapang nung Bayern Munich nungi asayar Mathys Tel Tottenham-i loan nung ogo.

City nungi Ballon d'Or anguba asayar Rodri temekok yiruba ajanga season tepeyong masayateti aliba mapang ka nung parnok midfield nung kanga tashi meiti lir aser Deobarnü parnok Arsenal-i goal 5-1 agi koka parnok temaba jenjang nung aliba Liverpool team dang nungi point 15 agi tajemba kümogo.

Taoba mapang Barcelona midfielder Gonzalez ya pound million 50 agi alizükogo, ta osang ajanga metetdaksü.

"Kü indang career nung tang iba ya maongka tetemtsü ka lir," ta Gonzalez-i ashi.

"Ni Pep koda ajung aji meteta lir aser pa den inyaksü matateter. Pai ni pa indang team nungi asayadaksünüba ya tetushi tulu lir," ta paisa shisem.

City-i, January ita Egypt

nunger forward Omar Marmoush aser defender Vitor Reis aser Abdulkodir Khusanov nunger alizükba mapang pound million 120 dak tema intokogo.

Kasa mapang nung transfer window shibangtsü ghonda ishika dang lia Tottenham puri Bayern Munich nungi Tel anir aruogo.

January transfer window nung Bayern den pound million 50 alang tenangzüktepba ka yanguba sülen Tel-i Spurs nung adentsü atema maongka agütsüba magizük.

Ajisüaka arishi küm 21 tain France nunger asayar ya season tembanga asayatsü asoshi Tottenham-i loan nungogo aser lemluwa teti asoshi tenangzüktepba yanglutsü lenmang samdema lapoka yuogo

Maneni Tottenham puri Crystal Palace captain Marc Guehi asoshi pound million 70 agütsüba magizük. Chelsea nungi asayar Axel Disasi-a iba London club nung adentsü atema sendaktepa aruogo, saka pa Aston Villa-ang ao.

Karunaratne Tests asaya nungi anisüngzükhitsü



Tsüklai/February 4, 2025

(Agencies): Sri Lanka opener Dimuth Karunaratne, iba hopta Australia den Galle nung tanabuba Test asayaba sülen Test cricket nungi anisüntzükhitsü. Iba asaya ya pa asoshi Test asaya 100buba asütsü.

Arishi küm 36 tain left-handed batter yagi Test asaya 99 nung run 7,172 yanglur lir aser pa ya Angelo Mathews aser Kumar Sangakkara o Mahela Jayawardene nunger sülen Sri Lanka nunger rongnungi Test asaya nung run timtiba yangluba asayar

pezübuba lir.

Mezüngbuba Test asaya kanga mejungi tamakok anguba sülen Australia den tanabuba Test ya par team asoshia tang asaya aliba World Test Championship cycle nung tatembangbuba asaya asütsü.

2026 küm May tashi nung Sri Lanka team Test ana dang asayatsü renema lir.

"Taruba WTC cycle nung asayatetsüsa lanur asayar asem pezü lir anungi asaya nungi anentsü atema tang ya mapang shitak," ta taoba captain Karunaratne-i

ESPNcricinfo dang ashi.

"Iba den ano iba asaya ya Galle nung asütsü kong ni mezüngbuba asaya liasü, anungji idaki asaya tembangtsü tajung asütsü," ta pai ashi.

Karunaratne lenisüba nung Sri Lanka team 2019 nungi 2023 tsüngda Test asaya 30 asayaogo. Pa lenisüba nung team-i asaya 12 ako aser asaya 12 mekoki liasü, kong South Africa 2-0 agi akokba densema lir.

Maneni pa one-day internationals-a 50 ben asayaogo, saka red-ball cricket nung asayaba amabo masayatet.

"Test 100 asayatsü ya melarabo masü aser na opening batter ka süra kanga tasak kechiyong nai team asoshi tangari minyaknüba mapa inyaker," ta Karunaratne-i ashi.

"Ni tesasaba ka lira Test nung run 10,000 metongtetba ya asütsü.

"Ni 2017, 18 aser 19 küm kanga junga asayba mapang ni iba alizüng tongtettsü ta bilem saka Covid agi kongshi aser Sri Lanka team Test aikabo masaya," ta pai ashi.

BILEMDANGANG

"Pela litetbaji takok tulutiba lir."